

2025 in keatsjier yn punten, moaie punten en hichtepunten

Nei de earste moannen yn de seal dwaande west te hawwen, stie de jeugd fan 7 april ôf wer op it fjild fan Reduzum. Nei de clinic fan Puur Passie starten de trainingen foar jong en âld. Fansels folge troch kompetysjes en wedstriden op alderhande nivo's. In oersjoch fan de simmer.

- De earste wedstriid is tradisjoneel It keningskeatsen. Mei in aardich oantal keatsers op papier is der in moaie list gearstald sadat elk syn gerak krige.
- Op 11 maaie noch in klassiker, de Eelke en Anna Partij. Guon keatsers diene mei oan de 'waarme' loop fan Ljouwert of Hyrox en sa stiene der in pear partoeren minder op de list. Mar nettsjinsteande de waarmte waard der fûl striden om de prizen.
- It pearkekeatsen is sa'n partij mei gâns minsken op it fjild. Mei lytse en sachte bal. Hiel gesellich oant yn de jûn (op it terras). Geweldich organisearre en laat troch de 'pearkekeatskommisje'.
- Fansels mei it strjitkeatsen net fergetten wurde. De jeugd wie manmachtich oanwêzich, mar de âlderen lieten it wat ôfwitte. Mei ynternasjonaal publyk lâns de kant en alle (senioaren)finales waarden op de stân fan 5-5 en 6-6 beslikke.
- Op 14 juny waard it NK skoaljonges by ús op it fjild ferkeatst. Mei Jesse Moos, Daam Noordenbos en Rindert Douma hiene wy in moai partoer. Yn de 1e omloop pakten se Easterlittens, mar yn de 2e omloop koene se it tsjin Eksmoarre net bolwurkje. Húns-Leons wûn de krâns.
- Elk jier striidt de Redúster jeugd tsjin de jeugd fan Wytgaard. It wie ôfgrysluk spannend, mar úteinliks is de wikselbeker mei Wytgaard gong.
- En sa wiene der ek noch (KNKB) wedstriden foar de jeugd, te witten: regio welpen en pupillen en frije federaasje. Us pupillejonges gongen nei Dokkum foar it NK en kamen mei de trede priis thús. In boppeslach!!
- De Freulepartij is foar de jonges de wichtichste partij fan it jier. Lars, Jesse en Thijs striden tige spannend tsjin Sint-Anne. Dêrnei Blije, wer in kreaker en op de tredde list tsjin Achlum. Dat like earst knap, 2 spul foar, mar doe krige de tsjinpartij it yn de smizen. Der waard net in buordsje mear pakt en gjin priis dizze kear.
- Snein 13 july fûn de earste edysje fan it fuotbal-keatsen plak. Flinke dûken op it hurde fjild leveren moaie mominten op. It is grif foar de organisearjende kommisje en spilers foar werhelling fetber.
- En oan de ein fan it simmerskofft wiene der noch in Trije Doarpen sachte bal partij, in muorrekeatstoernoai en de merkepartij fan 'e KNKB foar de 1e klasse manlju en froulju. Gesellige en moaie wedstriden.

En dit alles koene we net sûnder de stipe fan **jimme**, frijwilligers en sponsors!!

Wy wolle dan ek **TIGE TANK** sizze tsjin elk dy't op hokker wize dan ek holpen hat. En wy hoopje dat jimme ek kommend jier wer reewillich wêze sille om te helpen.

Ek noch in wurd fan tank oan de bern fan Johannes en Dukke Zijlstra foar it legaat dat wy krigen hawwe om ús krânsen meitsje te kinnen.



Aginda algemiene ledegearkomste

Op moandei 19 jannewaris 2026 om 19.30 oere yn de kantine op it sportfjild

1. Iepening
2. Ynkomen stikken en meidielings
3. Ferlach foarige jiergearkomste
4. Seizoen 2025
5. Jierferlach ponghâlder
6. Ferlach kaskommisje
7. Bestjoerssaken
Ofgeand en net werkiesber: Willem Fopma
8. Jeugdbestjoer
Ofgeand en net werkiesber: Kirsten Jorritsma en Annie van Dijk
9. Rûngong kommisjes
10. Foarriedige wedstriidaginda 2026
11. KNKB- en regiosaken
12. Rûnfraach
13. Sluting

Komt
allen!



Webside

Wy bin drok dwaande om ús nije webside kreas en tagonklik te meitsjen foar eltsenien. Fan 1 desimber ôf sil wichtige ynformaasje op de haadpagina te lêzen wêze.

Sa ek it berop wat we op jimme dogge om wer in moai en noflik seizoen gear te stallen. Tink hjirby oan trainingen, wedstriden en besibbe saken. Nim in pear minuten de tiid om de brief mei taheakke fragen by del te gean. Dizze brief is healwei novimber ek fia de e-mail nei alle leden ferstjoerd.

Mear ynformaasje? Sjoch op www.kaatsverenigingjanreitsma.nl

Yn petear mei Daam Noordenbos

Werom sitsto op keatsen, wat fynst der sa leuk oan?

It is in moaie sport en bûten wêze fyn ik lekker. Ik fyn it wol gesellich om elke kear mei in oare maat te keatsen. Foar in twadde sport is dit moai tichtby. Ik ha ek wol fuotballe, mar dat is my dochs wat te fier fuort.

Ast ien feardichheid kieze moast om perfekt te kinnen, welke is dat dan?

Foaryn it perk en dan de moaie baltsjes útslaan. It is leuk om op dy ballen om te houwen. As de tsjinstanner te goed op slaan kin gean ik wol achteryn stean. Dat is my dan te dreech.

Mei welke bekende sporter wolst in kear traine?
Besjoen oer alle sporten is it in kuorballe en foar it keatsen is it Stefan Koster. Us heit sponsoret him, dus is it kiezen net sa dreech.

Wat dochst om te ûntspannen nei in swiere wedstriid as training?

As ik thúskom nim ik in goed board fol iten, want foar it keatsen ite is net fijn. Dêrnei nim ik in hearlik toetje en dan gean ik lekker gamen.

Wat is de bêste tip dy'tsto fan in coach hân hast?

De hân rjocht hâlde, ik wie foarhinne in skepper. Soms oerkomt my dat noch wolris hear, mar it wurdt wol minder.

Welke dream wolst ooit berikke?

Ik wol begjinne mei in priis op de Freule te winnen. De PC leit noch krekt wat te fier fuort.